

Гурвн эрдмтә Гәрән Владимир

Өрүн болгын Садовое селәнә бргн уульнар дундин нургъта, кӧдлмшт ўмсдж хувцта баахн кӧвўн йовдж йовхнъ ўзгднә. Ўмсдж йовх хувцарнъ шинджлхлә — кӧдлмшт оч йовх бәәдлтә. Болв, энўнә сў дорнъ дектрмўд ўзгднә. Тиигхлә, эн кўн сургъуль дасхар йовдж йовх кўн гидж бй санув.

Эн метәр, долан джил хооран, Гәрән Владимир Краснопартизанск механизацин училищд орла. Тиигхд Владимир джиргълин захас шинкән тач йовх, бичкн кӧвўн билә. Тер училищән дуусад, трактор йовулх зӧвшәлтә цаас гартан авла.

Училищ дуусснас авн ўр Гәрән Владимир Алтайск крайин эмнг болн эмнгшрсн газр хагълдж, ик ургъц ургъадж йовсн кўн болджана.

Гәрән Владимир эврәннъ кӧдлмшән меддг, йоста сән тракторист болчкв. Болв эн Владимирт дасдж авсн эрдмнъ багъ болдж медгдв. Хойрдгч эрдм дасх седкл зуўв. Тиигад комбайн йовулдгиг даснав гидж Мамонтовск механизацин училищд орв.

Тер училищән 1953 джил дуусад, комбайн йовулх зӧвшәлтә цаас авб.

Хавр, намрт Владимир тракторарн газр хагълд, зунднъ болхла, комбайнар тәрә хурадж йовб.

1956 джилин намр алднд Гәрән Владимир ӧрк-буларн тӧрскн газрун нўудж ирлә. Тегәд ўр Гәрән Владимир Сарпинск района „Сарпинский“ совхозд комбайнер болдж кӧдләд, нидн „Сталинец“ комбайнар 600 гектар тәрә хурав.

Механизатор ўр Гәрән Владимир ода хойр эрдмтә. Болв эн авсн эрдмнъ багъдад, гурвдгч эрдм сурхар района ДОСААФ-н комитет бӱрдәсн шоферин курст ордж сурад, маши йовулх зӧвшәлин цаас авчкв. Ода ўр Гәрән Владимир трактор, комбайн болн автомаши йовулдж чадна.

Эн, багъчудт улгур болм йовдл.

Н. ТИМАНОВ,

Сарпинск района, Садовое селән